

DOMENIE XXIX «VIE PAL AN»

Antifone di jentrade Sal 16,6.8

Jo ti clami, Diu gno, ma tu rispuindimi.
O soi sigûr che viers di me tu slungjis lis tôs orelis.
Vuardimi, Signôr, come la lûs dal voli,
platimi te ombre des tôs alis.

Colete

Diu onipotent e eterni,
danus une volontât che si plei simpri denant di te
e di servî a la tô maiestât cu la scletece dal nestri cûr.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 45,1.4-6

O ài cjàpât Ciro pe diestre, par sdrumâ denant di lui i forescj.

Dal libri dal profete Isaie
Cussì i dîs il Signôr al so onzût,
a Ciro, che lu à cjàpât pe diestre,
par sdrumâ denant di lui i forescj
e par dispeâ i cinturons dai ombui dai rês,
par spalancâ denant di lui lis artis
e par che lis puartis no restin sieradis.
«Par amôr dal gno servidôr Jacop,
e di Israel, gno elet,
ti ài clamât par non,
ti ài dât un titul cuant che tu no tu mi cognossevis.
Jo o soi il Signôr, no 'nd è altris;
denant di me nol è nissun diu!
Ti ài peât cuant che tu no tu mi cognossevis,
par che a sepin dal jevâ al lâ a mont dal soreli
che denant di me al è il nuie;
jo o soi il Signôr e no 'nd è altris».
Peraule di Diu.

SALM RESPONSORIÂL dal Salm 95

R. A ti, Signôr, la potence e la glorie.
Cjantait al Signôr une cjante gnove,
cjantait al Signôr di dute la tiere.
A ducj i forescj contait de sô glorie,
framieç di ducj i popui i siei spetacui. **R.**

Parcè che al è grant il Signôr e al merte laudât,
tremet sore ducj i dius.
Di fat i dius dai popui a son un nuie,
impen che il Signôr al à fat i cîi. **R.**

Dait al Signôr, fameis dai popui,
dait al Signôr glorie e potence,
dait al Signôr la glorie che al so non i spiete;

cjapait sù ufiertis e jentrait tai siei andits. **R.**

Che e trimi denant di lui dute la tiere.

Disêt framieç dai popui:

«Il Signôr al regne!».

Al ten sù il mont par no che al clopi,

al judiche i popui cun justizie. **R.**

SECONDE LETURE 1 Ts 1,1-5

O vin presint la vuestre fede, l'amôr e la sperance.

De prime letare di san Pauli apuestul ai Tessalonicês

Pauli, Silvan e Timoteu a la glesie de int di Tessaloniche, in Diu Pari e tal Signôr Jesù Crist: grazie a vualtris e pâs!

O ringraciìn simpri Diu par ducj vualtris, ricuardantjus tes nestris preieris, vint presint di un continui denant di Diu e nestri Pari la operositât de vuestre fede, il sfadiâ dal vuestri amôr, la fermece de vuestre sperance tal Signôr nestri Jesù Crist. O cognossin, fradis benvolûts di Diu, la vuestre clamade, parcè che il nestri vanzeli no us è stât predicjât dome a peraulis ma ancje cun fuarce, cun efusion dal Spirtu Sant e cun plene convinzion.

Peraule di Diu.

CJANT AL VANZELI Fil 2,15-16

R. Aleluia, aleluia.

Lusît tal mont come stelis,

tignint alte la peraule di vite.

R. Aleluia.

VANZELI Mt 22,15-21

Dait a Cesar ce che al è di Cesar e a Diu ce che al è di Diu.

Dal vanzeli seont Matieu

In chê volte, i fariseus, sintût che Jesù al veve fat tasê i saduceus, ritirâts in bande, a faserin consei par cjapâlu in fal tai siei discors. A mandarin duncje di lui i lôr dissepui, insiemi cui erodians, par dîi: «Mestri, o savìn che tu sês sancîr e che tu insegnis la strade di Diu cun veretât e che no tu âs sudizion di nissun; di fat no tu cjalis in muse nissun. Disinus alore ce che tu pensis: Isal permetût o no di paiâi la tasse a Cesar?». Jesù, cognossint la lôr falsetât, ur disè: «Parcè volêso tentâmi, fals? Mostraitmi la monede de tasse». E i presentarin un denâr. Ur disè: «Di cui ise la muse cu la iscrizion?». I rispuidin: «Di Cesar». E lui a lôr: «Dait duncje a Cesar ce che al è di Cesar e a Diu ce che al è di Diu».

Peraule dal Signôr.

Su lis ufiertis

Danus, Signôr, ti preìn,

di cirî cun cûr libar i tiei regâi,

par che, purificâts de tô grazie,

o vignin smondeâts propit cui misteris che ti servìn.

Par Crist nestri Signôr.

Antifone a la comunion Sal 32,18-19

Il voli dal Signôr si poe sun chei che lu rispjetin,

sun chei che tal so boncûr a sperin,

par sfrancjâ de muart lis lôr vitis,

par tignîju in vite in timp di miserie.

O ben: Mc 10,45

Il Fi dal om al è vignût par dâ la sô vite
in riscat par tancj di lôr.

Daspò de comunion

Il contat cu lis robis dal cîl
che nus zovi, Signôr,
par vê i tiei benefizis in cheste vite
e par jessi iluminâts su lis Realtâts eternis.
Par Crist nestri Signôr.